

Am 1. Febr.  
Brennas. A. 1806.

**Charter waarbij het Kapittel van Sint Pieter te Utrecht een perceel land aan De Meern, genaamd de Broodakker, in erfpacht uitgeeft aan Steven Goijertss. de Witte, 17 mei 1612.**

1 Up huyden den VIIen dach maii XVIc ende XII na den ouden stijl compareerden voor mijn onderschreven openbaer notaris bij den Hove van *Utrecht* geadmitteert ende den getuy-  
gen hieronder benoempt STEVEN GOIJERTSS. DE WITTE voir hem, sijnen erven ende nacomelingen, ende bekenden den inhouden van den erffpachtbrieff hiernaer van woorde  
tot woorde volgende: “Wij deken ende capittel der kercke van *Sinte Peters t’Utrecht* doen condt allen luyden, ende lijen ende kennen mits deesen, dat wij in enen ewigen erffpacht ver-  
lijt ende verleent hebben, verlijen ende verlenen mits desen STEVEN GOIJERTSS. DE WITTE voir hem, sijnen erven ende naecomelingen een stuck lants genaemt den Brootacker gelegen  
5 aen die Meern bij Nijevelt, daerboven jonker STEVEN VAN ROSSUM ende beneden HENRICK RUIJSCH ende BEERNDT VAN DER HAERS weduwe naestgelant zijn, streckende uut Heijcooper  
Weeteringe tot aen zeker onser kercken landt, die van ons bij den voors. STEVEN in huyle gebruyckt zijn eertijts, alse ’tselve stuck landts duer dode van GOIJERT LUDOLPHSZ.  
DE WITTE zijnen vader op hem gesuccedeert ende gedevolveert is, elx jaers om eenen gouden croon mitter sonnen off die rechte weerde daervoor aen andere gelden in der  
tijd der betalinge binnen *Utrecht* gangber wesende, te betalen ons off onsen camerair in der tijd jaerlix tot alle Sinte Petersdage ad Cathedram, off binnen veerthien daegen daernaer  
onbegreepen, ende soo voort jaerlijx binnen *Utrecht* in onser kercke, vrij ende commerloos te leveren op STEVEN GOIJERTSS. voirs. cost anxt ende arbeyt sonder enigerhande affcortinge  
10 off verminderinge des voirs. pachts, ’tzij van inbreeckinge van dijcken, van oirloge, van brande, van rooff, van onweeder, ontsseggen van heerenbede, heerenschattinge  
ofte van andere enige saicke off oncost die op ’t voirs. stuck landts comen mocht off werden geseten in wat manieren dattet waere, met sulcke vorwaerden dat ’t voirs. stuck  
landt nae STEVEN GOIJERTSS. doot comen ende blijven sal op zijn outste erffginaem effen nae die man voor dat wijff, ende soo voort van erffginaem tot erffginaem, ewelick ende erffelick on-  
gescheyden ende ongedeylt. Voort sijn ’t voorwaerden, dat STEVEN voirs. ende zijn erffgenaemen ende naecomelingen dit voirs. stuck landts nyet en sullen mogen aen nymandt anders brengen, ver-  
copen, versetten, versellen, splijten noch deylen, tensij bij onsen wille ende consente, noch sijn ’t vorwaerden, dat STEVEN voirs. voir hem ende sijnen erven ende naecomelingen een re-  
15 cognitie ofte belijdinge doen sall voor den Officiael van *Utrecht*, ofte anders voir wat rechten ofte rechters dat wij willen, geesttelicke ofte weerlicke, dat hij dit stuck lants  
voirs. ons ende onser kercken toebehorende in alle manieren ende vorwaerden in desen brieff begrepen in enen ewelicke erffpacht ontfangen heeft, ende anders gheen recht daeraen en heeft  
dan hem van ons in desen brieff gegeven es, ende hij sal mede loven voor den selven rechter ofte rechte alle dese pointen ende voirwaerden in desen brieff beschreven te houden  
ende te voldoen sonder enige wederseggen. Voirt sijn ’t voirwaerden, dat elcke nye erffginaem daer deese erffpacht op comen sal, nae STEVEN voirs. doot sall binnen den  
eersten jaer daer hij in gestorven is, bij ons comen ende neemen nye brieven sprekende als deesen brieff spreekt, ende ons een recognitie ende belijdinge doen in allen manieren als  
20 voirs. is, ende dit al op des versueckers cost. Oick sijn ’t vorwaerden, waer ’t saecke dat STEVEN voirs. off sijne erffgenaemen jaerlijx ende alle jaer opten voirs. termijn den  
voirnoemte pacht nyet voll ende all en betaelden, off enich van de pointen in desen brieff geschreven braecken ende nyet en voldeeden, soo viel hij rechtevoort van deesen erffpacht  
ende allen rechten dat hij daeraen hebben mocht, ende soo quaem ’t voirs. stuck lants alsdan weder aen ons ende aen onser kercken voirs. onsen vrijen wille daarmede te doen.  
sonder yemandts wederseggen, sooverre wij dat aen ons neemen wouden, ende anders nyet. Beheltelicken ons nochtans al ons verschenen pachts ende onbetaelde pacht  
die ons dan affterstedich waer, die ons STEVEN voirs. off zijnen erffgenaemen mit alsulcken cost als wij off onse bode daerom deden, des men ons off onsen boden  
25 tot onsen ofte hoeren simpelen woorden gelooven sall, voll ende all betalen sullen sonder enich wederseggen. Alle arch ende list uutgesondert. In oorconde der waarheyt  
hyeroff hebben wij deken ende capittle voirs. deesen brieff mit ons capittles segel doen bezegelen. Gegeven in ’t jaer ons Heeren duysent seshondert ende twaelff  
op den sevenden dach in mayo na den ouden stijl.” Ende was ondertekent W. MOERENDAEL deken subscripsit ende besegelt mit een segel van groenen wassche daer onderaen uut-  
hangende in dubbelen sterte. Ende bekenden hij comparant voorts anders gheen recht aen ’t voirs. lant te hebben dan hem daeraen mitten voirs. brieff gegeven en  
is ende belooffden hem in den inhouden vandyen bij den Hove van *Utrecht* te sullen laten condemnieren. Aldus gedaen t’*Utrecht* op den dage ende jare voirs. ter presentie van de  
30 eursaeme ende loffweerdige mannen WILLEM SIJMONSS. VAN HOUWERT schout der voirs. kercke, ende FLORIS UUTTEN ENGHE als getuygen daertoe specialick ge-  
beeden. In kennisse van mij onderschreven openbaer notaris, die desen recognitiebrieff daarvan gemaect, onderteyckent, ende voor den comparant besegelt  
hebbende tot zijner beede.

[get.] mij pnt. C. Brunings nots. publ.

Bron: Het Utrechts Archief

Toegangsnummer: 220 Kapittel van Sint Pieter te Utrecht (3.8.3. Landerijen aan het kapittel behorende, in het Nederkwartier)

Inventarisnummer: 535-4 <https://hetutrechtsarchief.nl/collectie/609C5B9D75CE4642E0534701000A17FD> (De datum is 17 mei 1612, volgens de oude stijl is dit 7 mei 1612.)

Transcriptie: Paul de Wit © 23 november 2024 (De in regels 30-32 onderstreepte tekstelementen vallen onder de pliek, en zijn gelezen door medewerkers van Het Utrechts Archief.)